

JEMS

lokv Siti Jinam

Mintamchonam

Jems gv siti lvknam si jvjvklvkv rinamdaknam am laakumlaapa laikula tamsar kinunam am, “nyiamooku gv Pwknvyarnv gv nyi tloblobv doogodakgo kunv am si lvkla jikunamv.” Siti sum lvknv si angu angusinv gv lvkpvnam lokv kristan vdwgv lvgabv mvngkimvnglak la richadocha jinam am okv chigudabiala ribvdakbv sv lvkwng lo tamsarkinu jinam am kaatam jidu. Kristan peelv lokv minsvriv am aku akusinv gaam lokv hv mintam jito oogv mindunam vdww nyitvnam, nyimaheema nam, pokayarka nam, alvnnv rigvdogv nam, mimpvmimv nam, mvngjwng nam, okv rinampanam, gamriu am minvsunam, mvngkimvnglak nam, yamisinam, kaimvngsunam okv ribamdakbam laknam, kvvbiya jwngkadaka yanam, goonam, reniaknam okv kumnam vkvnnv tamsarkinu jinam am kaatam jitoku.

Siti lvknam si Kristan dormo gv mvngjwng dula kudungkua lokv kaatam laknam am dinchikochi yabv minji toku.

Arwng lokv darlinnam

Mintachonam (1:1)

Mvngjwng okv mvngkimvnglak (1:2-8)

Nyimaheema okv Nyitv (1:9-11)

Rikaripaknam okv pokayarkanam (1:12-18)

Tvvnam okv rinam (1:19-27)

Chatinkurbo nvnga gamrwnam (2:1-13)
 Mvngjwng okv kudungkua (2:14-26)
 Kristan okv vkvgv gamriu (3:1-18)
 Kristan okv nyiamooku (4:1-5:6)
 Angu angusinv minsarnam (5:7-20)

¹ Ahtu Jisu Kristo gv okv Pwknvyarnv gv pakbu akobv rinu, Jems lokv:

Pwknvyarnv gv nyi bu rinvdonv nyiamooku mvnwng lo tolobolo bu doogodoyit karnv vdwa kumrwklvtaksinam gaam am jilwk dunv.

Mvngjwng okv mvngkimvnglaknam

² Ngoogv ajin vdw, vdwlo nonugv lamtv lo nvgwng mvnwng gv hindwkkaku ngv aajvka um alv yanvbu mvngpu gya tvlaka, ³ Vkvlgavbolo nonu chindu vdwlo nonugv mvngjwng namv jwngjwk dubv ritvrinyi kvnv hindwkkaku namv doodu, kaakakunamv vv nonugv rilagvnuv am paamu dunv. ⁴ Hinchingla rinamv nonugv lamtv mvnwng lo gimup momabv vnggva ridubv mvrung dunv, vkvlgavbolo hoka nonu rvbwngching laduku okv ripwnggrinya laduku, oguguka achialin manamgo kaama laduku. ⁵ Vbvrityola nonu gvlo mvngkimvnglak madu bolo, Pwknvyarnvnyi kumrung tvlaka, hv nonua jire; ogulvgavbolo Pwknvyarnv jinwngnam dvdv nga okv mvnwng nga jinv ngv. ⁶ Vbvrityola vdwlo nonu kumredw, nonu mvngjwng rungto laka okv ogumvnwng nga mvngngum dvdvla riyoka. Yvvdw mvngngum la ridudw hv svmasa lvrallpa lo doori mila oogv sibu nuunam aingbu ridunv.

7-8 Nonu oogv aingbv ridubolo, nonugv mvngrum aralo mvngla manv okv rinam dvdvlo mvngpi lakmanv, Ahtu gvlokv nonu oguguka paanvpv mvngla rungmare.

Nyimaheema okv nyitvtvbwngv

⁹ Heema bv rinv kristan vdwv vdwlo Pwknvyarnv heema lokv nyitv dukubv bunua laacha rekudw um mvngpu rungto laka, ¹⁰ okv nyitv bv rinv kristan vdwv vdwlo Pwknvyarnv heema dubv bunua laalu rikudw vvka mvngpu rungto laka. Vkvlgavbolo nyitv vdwv mootum apung gv siriuria nam aingbv riri nvpv. ¹¹ Doonyi gv chaatarchanya ikunyi agurusok lakula okv nvsin-nvmwng nga sinsuk mola kaayuk duku; ho apung ngv hoolahuaa duku, okv vkvgv kaapu vka nye-duku. Oogv aingbv bunu korvpachu rikwng jvka nyitv ngv nyenam bv nyereku.

Rikwhingkw okv pokayarkanam

¹² Hindwkkaku nga hinjeka yvvdw mvngjwng nga vngdwng bv vvpvla ridunv hv himpu am paare, vkvlgavbolo vdwlo bunu vkvnv rikwhingkw namv vngbo rikudw, Pwknvyarnv gv paknam vdwa jidubv vla milvpvnam oogv turnam amin am bunugv paasvnga bunu paareku. ¹³ Ngonu svkvnv pokayarka namgo aajvka, “si Pwknvyarnv gvlo aadunv vla mirung mabvka.” Vkvlgavbolo Pwknvyarnv alvmanv lokv pokayarka madunv, okv nw awv yvvnika pokayarka madunv. ¹⁴ Vbvritola ngonua pokayarka la ridunam si vdwlo ngonu mvngjimvngrio la okv atubogv alvmanv

mvngnam lokv kuplwksudu. ¹⁵ Vbvrinamv ngonugv alvmanv mvngjimvngro nama gvbum pvvku lokv okv rimur am kuu bv bvnglin duku; okv rimure, vdwlo akomaring rikudw, vv sinam bv bvngdu kunv.

¹⁶ Ngoogv ajin vdww, Kupku yoka! ¹⁷ Alvuv amin dvdv ngv okv ogumvvnwng vjvgv rilak rikunamv nyidomooku lokv aadunv; vv Pwknvyarnv gv lokv aadunv, nyidomooku gv ungbiatata gvuv nga Pwklinyarlinnv ngv, oogv vdwloka akupav manv vmajvka kanv kaamanv. ¹⁸ Vklvgavbolo ninyigv pwknamyarnam dvdvlo ngonuv atuake lo doocho modukubv vla, ninyigv awgv mvngnam lokv ngv vkvgv jvjvrungnv gaam lokv ngonua laalwk toku.

Tvvnam okv ridungnam

¹⁹ Ngoogv ayanam ajin vdww, sum mvnggap tvlaka! nyi mvvnwng ngv nonu baapu alvv tvvgap rungto laka, vbvritola gaam minam am tapv bv minto laka okv dokchachaba nv gobv riyoka. ²⁰ Nyia haachi gv sakcha namv Pwknvyarnv gv darwkchongjor mvngdung nga paama dunv. ²¹ Vklvgabv ogumvvnwng gv kasingkanyak okv alvmanv rigvdogvnam dvdv nga um kayu tvkuka. Oogv nonua ringlin lajikunv, Pwknvyarnv gvlo laklwk sutoka okv nonugv haapok lo vkvgv gamchar jilwk nama laarwk suto laka.

²² Nonuno ninyigv gamchar am tvvuv mvngchik gobv ridula atu nvnga kupsu yoka; vbvmayabv gamchar yanga tvvla rinvdagnv gobv rito laka. ²³ Nonu gamchar am tvvuv gobv ridula, vbvritola rinvdaknv gobv rima dubolo nonuno

vkvnv nyi aingbv ridu oogv tumuyalu lo awv nyukmu am bunu atubogv oquaingbv ripvdw kaasu mvngchik sunam aingbv ridu. ²⁴ Bunu atubogv aw am lvkingo alvjvbw kaasu pikula okv vngreku okv vjakpiak bv bunugv aw kaasu nama oquaingbv ripvdw um mvngpa sukumare. ²⁵ Vbvritola oogv nyi am ajarabi bv rimu kujinv Pvbv rvbwngchingnv um alvjvbw kaanvk chikvk la, okv alvjvbw tvvgap la okv tvvnam mvngchik bv tvvmabv okv vbv mvngpa mabv rimabv okv vbvritola rinvdaknv gobv ribolo—nonuno ogugo ridudw Pwknvyarnv nonua boktalwkjire.

²⁶ Nonu yvvla mvngdunv nonuno dormo ridunv? Nonugv riu am laatung sima dubolo, nonugv dormo rinamv anyung kaama nvbv ridu okv nonuno atubonga kupsu dunv. ²⁷ Pwknvyarnv Abu gv mvnglwkw bv darwkla okv dormo rijwknam si: opin okv hvngmi vdwa bunugv hindarkaso am kaagurnam okv nyiamooku sokvgv alvmanam am atubongv kaachingkaamu sinam um rijwk nvbv tulwkdu.

2

Kiamla rinv lvkwnglo gamrwnam

¹ Ngoogv ajin vdw, ngonugv Ahtu Jisu Kristo gv yunglit gv Ahtunyi mvngjwngnv gobv ridula nonuno vdwloka nyi vdwgv aolo gvvnambunam am kaala vbv angusibv riyoka. ² Nyitv nyi go ain lakchap gvvnv okv alvnnv vji koonv go, okv heema nyi vji jeinjipen koonv go doopam lo aabolo ³ um nonuno oogv vji alvbv koonv um

alvyasin bv mvngdv la, ninyia mindu, “alvy-choknv dotum so dootoka vdu,” vbvritola heemanv nyi am mindu, “alo daktoka vdu, vmalo nyopia sika ngoogv lvpa kampwk lo dootung tvka vdubolo,”⁴ vbvrikunamv nonugv aralo atubongv akiumariam la rigak palindu okv alvmabv mvngnam lo jwngladala riduku.

⁵ Ngoogv aya minsunam ajin vdww, tvvgap sitoka! nyiamooku soogv heema nyi vdwa, mvngjwng lo nyitv dubv okv oogv yvvdw ninyia pakdudw karv lo doopa dubv hv milvpvula rikunam um paamu dukubv vla Pwknvyarnv darpv kunv. ⁶ Vbvritola nonuno heema nga mvngdv madu! yvvdw nonua heema vdwa minjapminrap jinv okv nonua jwnkadaka jinv gv kaagialo svvlin kujinv? nyitv vdww! ⁷ Vv bunu laka oogv nonua alvnnv amin jinam am alvmabv minjinv ngv.

⁸ Nonu Karv gv Pvbv am tvvdu bolo vv nonu alvnnv kudungkua nga ridungdu, oogv Darwknv kitap lo kaapanam aingbv, “nonugv aw am paksunam aingbv namrwksuku aka paktoka.”⁹ Vbvritola nonuno nyi gv aolo gvnambuknam am kaala ridubolo, nonuno rimur lo rigak paklwkdu, okv Pvbv ngv nonua pvbv mvkmvrwk yanv ako bv miyakaya la riduku. ¹⁰ Yvvdw Gamkinam akin gonyi mvkmvrwk jipvdw vv Gamkinam mvnwng nga mvkmvrwk yanv govb ridunv. ¹¹ Hogv minv akinnv minto, “yujuk nvgobv rimabvka,” vbvka mindvto, “nonuno gwngrw gwkyoka.” Nonuno yujuk nvgobv rima jvka, gwngrw gwknv govb ribolo vvka

Pvbv mvyak nvgobv rire. ¹² Nyi vdwgv oogv pvbv lokv ngonua anyutaku bv taalin dukubv jwngkadaka la rinam aingbv mintoka okv ritoka. ¹³ Holvgabv yvvdw ayanam kaamabv vdwlo hv nyi am jwngkadaka la ridudw um Pwknvyarnv aya ngam kaatam la rimare; vbvritola aya ngv anyunjenga jwngkadaka nga rigum yadunv.

Mvngjwng okv gwngnamsingnam

¹⁴ Ngoogv ajin vdw, nonu nyigonv mindu nonu gvlo mvngjwng dunv vla mintola gwngnamsingnam go nonu gvlo kaatam mabolo vv alvnam vri? Hoogv mvngjwng namv ninyia ringla redw? ¹⁵ Achiboru gonv majvka anyibormv gonv vji kosv go koopa manv okv dvnamtvingnam dsvgo kaama nvgo dobolo. ¹⁶ Nonuno bunua mvdurridur matola vbv mire, “Pwknvyarnv nonua boktalwkji laka! aw am hagurusuk bv dooladakla ka okv alvbv dvlawnglaka!”—vla vbv mimbolo vv alv nvngvdw? ¹⁷ Vkvlgabv mvngjwng mvngchikla: vv rimwng bolo, rinamgwngnam go dootak mabolo, vbvrikunamv sinamv.

¹⁸ Vbvritola nyigonv mire, “akonv mvngjwngla rinamv doodu, akonv gwngtamritam la rinamv doodu vnam sum” ngoogv mirwkdunv si, “gwngtamritam madula mvngjwng mvngchiknv yvvdw doodunv ngam kaatam laka. Ngo gvbv ngoogv mvngjwng sinama nonua ngo gwngtamritam nam lokv kaatamre.” ¹⁹ Pwknvyarnv akin mvngchikgo doodunv vla nonuno mvngjwng dunvre? Alvdo! uyuvram vka mvngjwng dunv—okv busu

dula hvkdwnsekyakdu. ²⁰ Nonu nyiposooyo vdww! Gwngtamritam namgo kaama tvla * mvngjwng namv anyung kaama vla kaatam nwnghdu nvre? ²¹ Ngonugv abuapa Abraham oguaingbv Pwknvyarnv gvlo tarwkbak bv doopvuv? Vv ninyigv kuunyilo akina Isaaknyi hv vdwo Pwknvyarnv gvlo erinpeelwk jidubv yugwngmvrwng hoka jilwkla gwngtamritam nam lokv tarwkbaknam am paatoku. ²² Nonu kaachin sila nyomare ai? Ninyigv mvngjwng vla okv ninyigv gwngtamritam namv lvkingobv karingsiching bv ridu; Ninyigv gwngnamrinam lokv ninyigv mvngjwng am rvbwngchwng modu. ²³ Okv darwknv kitap gv vbvching minamv jvjvtoku, um minto, “Abraham Pwknvyarnvnyi mvngjwng rungto, okv vkvgv mvngjwng nam lvgabv Pwknvyarnv ninyia darwkchonjor nvgebv laarwk sitoku.” Okv vkvlgabv Abrahamnyi Pwknvyarnv gv ajin gobv vdu kunv. ²⁴ Vbvrikunamv, nonuno kaatoka, ngonugv vbv gwngnamrinam lokv um ngonu Pwknvyarnv gvlo tarwkbak bv dooladakla dunv, okv ngonugv mvngjwng mvngchiknam lokvma. ²⁵ Yolaplapnv Rahap ka vbvching rito. Ninyigv gwngnamrinam lokv Pwknvyarnv gv tarwkbak dubv ritoku, ogulvgavbolo Israel nyimakmakru vdwa laarwk sila okv bunua mvdurridur gvdula lamtv kvvbi gulo kidu kubv kaatam jito.

²⁶ Holvgabv, adwnamar lo yalu kaama bolo sinam bv ridukunv oogv aingbv, mvngjwng

* **2:20** Kaama tvla; Kitap Kvgonv si doomado Siinam. **2:21**
 Atk 22:1-14 **2:23** Atk 15:6; 2Kri 20:7; Aij 41:8 **2:25** Jem 2:1-21

namv ka gwngnamrinam go kaamabolo sinam bv riduku.

3

Gamriu

¹ Ngoogv ajin vdw, nonu nyi achialvgonv tamsarnv govv singdu mvngma bvka. Vbv nonu chinsudu, kvvbi amum svnga ngonu tamsarnv vdwa maatar alvvv kairungbv jwngkadaka la rire. ² Ngonu mvnwng ngv rigakpanam am ribvdu. Vbvritola nyigonv ogugo mindudw hv vd-wloka rigakpanam go kaama dubolo, hv rvb-wngchingdu okv ninyigv atubogv singnam dvdvlo saktungsakpv siladunv. ³ Ngonu gora gv naptup lo mingkulo vngla dubv ngonu saasoki am mvlwk la ridu, okv ogolo vnggv so mvngdudw ho vnggv dubv mvladu. ⁴ Vbvmajvka svpw svvnam akonyi mvngka tvka: vv achialvvv kai nvgo okv vkvvv gwlvknv doori lokv mila vnggvdu, umka miang achoknv bangidaching gonv dorla vnggv ladu, okv um parnv ngv ogolo vnggso mvngpvvdw ho vnggv ladu ⁵ Holvgabv riu so lokvka vbvridu, si ka miang achokchai nvbv ridu, vbvrijvka si kairungnv uguogu am googv siladunv.

Vmv mvri charching achokchai lokv mootum tumra apum gonyi vdwgo gupakgurak ladunv sum mvngka tvka! ⁶ Okv riu si ka vmv aingbv ridunv. Si rigakpaku gv nyiamookuv, si ngonugv adwnamar so doolwkla okv ngonu gvlo doolwk dula adwnayak mvnwnglo alvmanv lo vngsik karmudu. Uyumooru lokv vmbbv gucha dunv

vv ngonugv turla risv mvnwng nga vmvbw gu-
 pak la guajila ridu. ⁷ Ngonu nyia si Pwknam-
 yarnam dvdv nga— mootum gv svnwngsvmin,
 okv pvta, tabwtai nga, okv Isi blogv rinu ngui mvn-
 wng nga mvnyuk la mvtumritum la rigv ladunv.
⁸ Vbvrítola yvka riu sum mvnyuk lama dunv. Si
 alvmanv ngv okv mvtorritor lamanv, sigv nvv
 gv chumdwk kv akomaringdu. ⁹ Ngonu riu
 sum Ahtunyi okv Abunyi umbonyikv vla mindu
 okv oogv Pwknvyarnv ninyigv aingbv pwknam-
 yarnam, nyi kvvbi aka beenvpanv laka ridu.
¹⁰ Gamchar vdw sokv umbonyikv vdu okv hoogv
 gaam akin lokv beenam aka milindu. Ngoogv
 ajin vdw, sum ngonu vbvrirung moma bvka!
¹¹ Sirung rungkin lokv chipunv isi gola kvchaknv
 isi go biipv silin madunv. ¹² Ngoogv ajin vdw,
 takuk singnv ngv, olibs apwasi seela madunv;
 okv anggur amia lokv, takuk apwasi seela madunv,
 vbvmajvka alu chipu manv isi ngv chipunv isi
 biilin madunv.

Ao lokv Mvngkimvnglak nam

¹³ Nonugv aralo mvngkimvnglak nvgo okv
 tvvchinlaknv go doodure? Um nonugv alvbv
 singnam lokv, alvbv rinam lokv angamai bv
 haapok aami sinam okv mvngkimvnglak nam
 lokv kaajwk simu sutoka. ¹⁴ Vbvrítola nonugv
 haapok arwng lo kavtavnam, kvchakchakmi
 sinam okv atubogv lvga mvngchikbv mvngdula
 nonuno mvngkimvnglak am kaimvngsu gvla jvfv
 gv nyirubv rila rimur murgv siyoka. ¹⁵ Vkvnv
 mvngkimvnglak nam vv nyidomooku lokv imaa

dunv; vkvnv vv nyiamooku sokv gvbv ridunv, vv alvmanv dow lokv okv uyuvram lokv ridunv. ¹⁶ Holvgavbolo ogolochinglo nonu gvlo tanium gvvmi sidudw, okv atubogv lvga mvngchik mvngdudw, ho jupjinam okv alvmanv nvgwng mvnwng ngv doodu. ¹⁷ Vbvritola Pwknvyarnv gv lokv jinam mvngkimvnglak namv mvnwng nga darwk yarung chodunv; si sarsopoyo laka rimu dunv, damdvnam, okv ajinaramnam dodunv; so si aya ngv akomaringdu okv alvnnv kudungkua mvnwng ngaka rilin modu; si kiamnam okv kaadubv rimwngnam vkvnv lokv adu mola ridu. ¹⁸ Okv alvnam si sarsopoyo lo sarsopoyo monv gv ali lilwk kunam lokv boklin nvnga nvvching kunamv.

4

Nyiamooku am ajinnam

¹ Nonugv aralo dvngmi sinam okv yamisi-nam mvnwng ngv ogolokv aadunv? Vv bunu hvriokpajaknam lvgabv nonugv haapok ara ngv mvngjimvngro nam lokv aadunv, vv nonugv aralo yalung bv pabvribv minsu modunv. ² Nonuno ogu ogugo mvngdu, vbvrijvka nonuno um paala madu, vkvlvgabv nonuno mimilami siduku bv mvngduku; Nonu achialvbv oguogu lvgabv mvngbiudo, vbvrijvka nonu um paala madu, vkvlvgabv nonuno yamisila okv yalung gobv ridu. Nonuno ogugo um jvdv mvngdudw um paala madunv vv ogulvgavbolo nonu um paarung nvpv mvngla Pwknvyarnv gvlo koomadu. ³ Okv vd-wlo no kooredw, um no paamadu, ogulvgavbolo noogv mvngnam saknam hv alvmadu; Nonu ogu

ogua atubogv hvriokpajaknam lvga mvngchikbv koodu. ⁴ Mvngjwng manv nyi vdw! nyiamooku gv ajin bv ridunv vv Pwknvyarnv gv nyiru nam nyimakv vnama nonuno chima lare? Nonuno nyiamooku gv ajin bv rinwng dubolo nonuno atubongv Pwknvyarnv gv nyimak bv mvsv dunv. ⁵ Darwknv kitap lo, “Pwknvyarnv gv Dow am ngonu gvlo doolwk monam si maatar alvv mvngbiu monvgo,” * vla minam sum jvfv nvgobv nonuno mvngma dunvre. ⁶ Vbvritola Pwknvyarnv gv oogv jinam anyuaya ngv kaibv gwlvk yaya nvgo. Darwknv kitap lo vvv mindu, “Pwknvyarnv kaimvngsu nvnga nvngtor pvvdu, vvvritola anyuaya am rvnyak la rin v nga jidu.”

⁷ Vkvlvgabv, Pwknvyarnv gvlo tulwk sutoka. Uyudvvv nga chartoka, okv hv nokv gvlo gvngv kelin riku. ⁸ Pwknvyarnv gv nvchilo aanwk tvka okv Pwknvyarnv ka nonugv nvchilo aanwv. Rimurnv vdwno, nonugv laak am lasuk tokuka! aolo kaaku mvngchik dubv rin, nonu vdwgv haapok am darwk mooto kuka! ⁹ Mvngdwk tokuka, kapto kulaka, okv nyiksinyikla biito kulaka; nonugv nyarminsomin nama kapnam lo lvkmi sitoka, nonugv mvngpua mvngru lo lvkto! ¹⁰ Nonu atubongv Ahtu gv kaagialo rvnyak tolaka, okv Pwknvyarnv nonua kai more.

Ajin anyingnga jwngkadaka nama Gamrwnam

* **4:5** Dow am ngonu gvlo doolwk monam si maatar alvv mvngbiu monvgo; Vmalo Pwknvyarnv gv maatar rungv kavvvnv Dow lo doolwk namv hv ngonugv aralo doolwk duku. **4:6** Nyit 3:34

¹¹ Ngoogv ajin vdw, ajin anyingnga minjimio mabvka. Nonu kvvbi mvngjwngnv ajin am minjimiyo jila vbmajvka, jwngkadaka jila ribolo, vv nonuno Pvbv nga minjimiyo jila okv jwngkadaka jila ridu. Nonuno Pvbv nga jwngkadaka la ribolo, vbvrikubolo nonuno Pvbv gv mingku lo vdwloka tvvnvgobv rimare vbvritola, um jwngkadaka yanv akobv ridu. ¹² Pwknvyarnv mvngchik Pvbv jinv ngv okv Jwngkadaka jinv ngv. Hv akin mvngchik ringla dunv okv mvyakmvchak laka rila dunv ngv. Nonuno ogunvbv mvngsu dunv, kvvbi am jwngkadaka yajinvngv?

Goolinguanv vdwgv lvkwnglo Gamrwnam

¹³ Vjak ngam tvvgap tvka, “Silu majvka aarunyi ngonu pamtv gulo mooying vngre, hoka ngonu anying nyinggo doore okv kurvpachu lo rila okv morko ain lo achialvgo pwkarpaakar dubv rire,” vla minv nonu. ¹⁴ Nonugv singtungritung ngv aarunyi ogunvbv riyikudw um nonuno chinsuma! nonuno aapumtalam gv mwkwmmwa aingbv ridu, vjv lvgabv kaapa la ridu okv vbvripikula nyenam bv nyelaku kaapa kumare. ¹⁵ Nonugv minrung svngv si: “Ahtu mvnggi bolo, ngonu turricho okv sum vmajvka um ridubv rire.” ¹⁶ Vbvritola nonuno kaimvngsudu, okv goolinguada; vbv goolingua nam dvdv ngv rigakpanam vrung.

¹⁷ Vbvrikunamv, ngonu vbv alvnnv kudungkua risv nga chirung lvjv tvlaka um rimabv ridubolo, vv ngonu rigakpala rimurdu.

5

Nyitv vdwa Gamrwnam

¹ Okv vjak, nonu nyitv nyi vdvw, nga tvvgap tvlaka! nonuno gvlo maatar alvbv chimbulya go aatv dunv lvgabv mvngrula okv kapla ritolaka! ² Nonugv nyitv ngv yalayaa roku, okv nonugv vji am tagit ngv chelachia nyami roku, ³ Nonugv ain okv raaji am chinglwng ngv dvmi roku, okv soogv chinglwng dvnv si nonugv lvkwng lo minjiyanv akobv rireku okv nonugv adwnayak ka vmv gukunam aingbv dvmichiki la rireku. Nonugv nyitvai am vjak gv anyung achok so pvvkum nyadu. ⁴ Nonugv rongo lo oogv kudungkua rinv nga rvklap lapnam am jiji kumadu. Nonuno bunugv kapnam minam am tvvtoka! Nonugv rongo lo aliame gvchinggvmu jinv gv kapnam rinamv, maatar alvbv Kaiyachonv Ahtu Pwknvyarnv gv nyarung lo tvvpala riduku. ⁵ Sichingmooku so nonugv singnam si hvriokpajak namv okv himpukain kunamv akomaring duku. Nonugv aw am vbv pootv mola rinamv erinpeedw gv alu lvgabv mvsudunv. ⁶ Nonuno nyabvdanv nyi vdwa miyakaya lachin okv gwngrw gwklachin okv bunu vdvw nonua ritor sula madu. *

Saktvnam okv Kumnam

⁷ Vbvkubolo, ngoogv ajin vdvw, Ahtu gv aama dvdv gobv, Saktv tvlaka. Kaaka tvka rongo mvnv vdvgv rongo nga mvlwk tokula bunu kvdw lo aamtami mvlkunam lindw am kaayakunam

5:2 Mt 6:19 **5:4** Det 24:14,15 * **5:6** nyi vdwa okv bunu vdvw nonua ritor sula madu; Vmalo Nyi. Pwknvyarnv nonua mvtor mare ai?

aingbv ridu. Bunu vdwv dvrw nyido okv dvra gv nyido am kaaya dula saktvla doodu. ⁸ Nonuka vbv saktvla doorung tvka. Nonugv mvngtin nama aokoko motoka, holvgavbolo Ahtu gv aadw aluv nvchi duku.

⁹ Ngoogv ajin vdw, ajin anying gv lvkwnglo pordvr minsu yoka, vbvrikubolo Pwknvyarnv nonua jwngkadaka mare. Jwngkadaka svngv nvchi duku, kaatam dukubv doya duku. ¹⁰ Ngoogv ajin vdwv, oogv Ahtu gv amin lo nyijwk vd-wgv japii kunam um mvnggap tvlaka. Bunugv hirukaya bv hindu laka saktvla rinampanam am hingvkagv sitoka. ¹¹ Bunugv chitam sikunam lvgabv ngonu bunua himpuv vduku. Nonu Job gv saktv sila duku nama tvtoku, okv Ahtu gv anyunganya aku ninyigv lvgabv jilwk kunam am nonuno chindu. Vkvlgavbolo Ahtu ayanam lokv okv arwngjv bv paknam amin lokv yarbingdu.

¹² Ngoogv ajin vdw, mvnwnng gv aolo, vdwlo milvpvnam go dooredw ho nonuno milvpvula beeingbuging nvnvgo beetak nvma bvka. Nyidomooku lokvka ogugo beetak nvla vbvmajvka sichingmooku sum beetak nvla vbvmajvka ogunv yikungyira go beetak nvla beeyoka. Vbv mvngchik mintoka, “umkv” okv “maakv” Vdwlo nonu umkv vsvgo dubolo umkv vla minchar jitoka, okv maakv vsvgo dubolo maakv vla minchar jitoka, okv vbvribolo nonuno Pwknvyarnv gv jwngkadaka nam arwnglo aamare.

¹³ Nonugv aralo mvngru mvngnvgo doodure? Vv bunu kumsu rungtoka. Nonugv aralo mvngpu

nvgo doodure? Vv bunu hartvbamtv nvnv mir-imimpak mirung dubv ridu. ¹⁴ Nonugv aralo lvvma nvgo doodure? Bunu vdwgv lokv gvrja nyigagatv vdwgvlv vngmu rungtoka, holvgavbolo bunua kumji monam lvgabv okv olib tvvli go Ahtu gv amin lokv bunua piakmu laka. ¹⁵ Soogv mvngjwngla kumku lokv lvvma nvnga mvpu reku; Ahtu bunua adwnamar nga gwlvk moreku okv rimur la bunugv rikunam um mvngnga jila rireku. ¹⁶ Vkvlgabv, nonugv ajin anying lo rimur minsukunam am mvngnga minsu dukubv minji minsu tvkuka okv ajin anyingnga kumgur minsu tvkuka, vbvribolo nonu vdwv um poya moriku. Alvvn nyigonvgv kumnamv achialvbv jwkrwrwtv gobv ridu. ¹⁷ Elija ka ngonugv aingbv nyinyupada gobv ridunv. Hv nyido homa dubv vla dinchirungbv kumto, okv vbv kumnamv jvjvrungbv anying nyingum gola patak gobv kvdw so nyido holwk jimu matoku. ¹⁸ Lvkodv hv kumdv kunamv, okv ao tlogv lokv nyido nga holwk molakula rito okv kvdw lo rongo nampo ngv alvrungbv aliamiv boklin molakula ritoku.

¹⁹ Ngoogv ajin vdw, nonugv lokv akonv jvjvnam lokv ngakla ngaga kubolo okv um kvvbi gonv akonv nam aakur mola ridu, ²⁰ sum mvnggap tvlaka: yvvdw rimurnv um rimur lamtv loka laakur dukudw oogv rimur nvgv yalua † sijikunam lokv ringdu kunv okv rimur meego rikunama mvngnga jidukubv laalwk jiduku.

5:14 Mk 6:13 **5:17** 1Dv 17:1; 18:1 **5:18** 1Dv 18:42-45 **5:20**
 Nyit 10:12; 1Pit 4:8 † **5:20** Oogv rimur nvgv yalua Vmalo Ninyigv
 atubogv yaluv.

ANWNV GAMLV
Tagin first Bible translation based on TEV (Good News)
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin
Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed